



## 撐棟撐

「有『棟棟叉』欸！」係別莊个龍過路啦！佢兜熟絡个弄在對門个細巷仔入。「撐·棟·撐，七·捶·七！撐·棟·撐，七·捶·七！」係龍膠莊項个大伯公相借問、額頭个鼓仔聲。

「撐棟撐，七捶七！撐棟撐，七捶七！」穀穀个鼓仔聲，係本莊个龍起勢迎了，大家出來踎龍哦！龍珠捩捩轉帶等龍頭，左起右落、左起右落，牽等電火个龍身逐等龍珠，左磬右璫、激上激下像紅紅个火屎連起來个花火樣仔，還靚啊！一下仔，龍珠又弄等龍頭在自家个龍圈肚鑽過來鑽過去，搞到自家纏等自家又毋會打結，還生趣哦！跳龍了！十過節个長龍在路項橫等，對龍尾起勢一節一節跳往前，穀穀个腳花、齊腳跳起跳落，還好看哦！滾龍了！滾龍了！龍身箍起龍頭，龍頭分自家捲著了，龍身略略仔寮下來、龍頭躍等龍珠放勢牯撐高，歸莊仔人都踎等迎龍个人「喲！」一聲，紙炮仔滿哪仔必礫噼掠、火煙沖上天頂像也踎等大家邊講「喲(好)」樣仔！

毋過係堵著落水天，大家个心肝肚就「噢呵」了！因為「撐·棟·撐」，會「涿·濕·濕！」。愛去哪位迎龍前，攞籬篙个人早一兩日就先去行拜帖了，哪日迎哪莊早早也都有安排，係堵著落水該就「噢呵！」了——迎龍个人會涿濕濕、踎龍个人乜少，就毋鬧熱了。

年下仔，取竹、剖篾、作龍頭、龍圈、龍尾、剪布、畫龍身、牽電火，後生人出工作龍、老人家出嘴教精，莊項个龍一年掙到比一年較靚。愛仰般跳、仰般弄，也有阿爸、阿公輩个功夫傳承。哪儕人較適當來攞籬篙、哪兩儕人來擎龍頭、麼人來擎龍尾、麼人正曉得擎龍珠，都有詳細个計劃。哪莊愛先行、哪位一定愛去，後生條仔也有煞猛膠老輩人學精。遠遠个山頂，就算正孤孤一戶人家，莊項个龍，乜會煞猛飛過去，山肚人正毋會眼望望仔、淨聽聲定定。點眼、迎龍、化龍，全全有遵過神明个龍，係頭擺月半時節苗栗各莊頭都有个鬧熱，踎龍也係阿婆揸等孫仔、阿哥牽等老妹，歸莊仔人毋會跌忒个齣事。

「撐棟撐，七捶七！」月半又會到了，龍又愛出來了，大家共下來去看迎龍哦！

作者：彭瑞珠

### ☆詞彙學習☆

- 【棟棟叉】dung dung ca：形容鼓聲。 【迈】fang：言語、動作超過一定的範圍。  
 【撐棟撐，七捶七】cang dung cang qid` dung` 【噢呵】o ho'：嘆息聲，意指「糟了」。  
 qid`：形容鼓聲。 【行拜帖】hang` bai tiab`：龍隊拜訪前，先投  
 【踎龍】ten` liung`：跟著舞龍隊伍走。 送拜帖。  
 【左磬右璫】zo` qin` iu fung`：左傾右斜。 【遵過】zun` go：徵詢、得到同意。  
 【激上激下】gieb song` gieb ha'：晃上晃下。

### ☆文法學習☆

- 【放勢牯】fong se gu`：盡力地、拚命地。同義用法有「盡命牯」、「盡勢牯」。「牯」本指雄性動物，此處則是沒有實義的詞綴。「放勢牯」可以僅說成「放勢、放勢仔」，但加上詞綴「牯」之後，有加強程度、語氣的意味。